

14. oktober 2025

UKA 2025/104+85

Nalunaaquttap aalajangersarneqarnera pillugu Inatsisartut inatsisaata allanngortinneqarneranik Inatsisartut inatsisaat (Nalunaaquttat ingerlaqatigiiffiannut allamut ikaarsaarneq, aasaanerani nalunaaquttap atorunnaarsinneqarnera)

(Siumut)

Nalunaaquttap aalajangersarneqarnera pillugu Inatsisartut inatsisaata allanngortinneqarneranik Inatsisartut inatsisaat (Nalunaaquttat ingerlaqatigiiffiannut allamut ikaarsaarneq, aasaanerani nalunaaquttap atorunnaarsinneqarnera)

(Naleraq)

Seqineq nuigaanngami nuisarpoq seqinerlu tarrikkaanngami tarritarluni. Pivusoq taanna qanorluunniit ilioraluarutta allanngortissinnaanngilarput.

Siumut isumaqarpoq ukiakkut 2022-mi Inatsisartut nalunaaqutaq pillugu allanngortitsimmata, kingunerisut asuliinnaq tigusaanngitsut. Naak allanngortitsinerup nalaani ilimasuutsit pitsaasuusinnaagaluartut, Siumut isumaqarpoq, kingunerisut inuunitsinnut pitsaanngitsumik kinguneqarsimasut.

Siunnersuut tunngaviusumik marlussunnik imaqarpoq, tassaappullu nalunaaqutaq seqineq malillugu ingerlaqqilissasoq aamma aasaanerani nalunaaquttap siunertaqanngitsumik nikisittaqaattarnera unitsinneqassasoq. Ataatsimut oqaatigalugu UTC -3 uterfigissagipput aamma upernaakkut ukiakkullu nalunaaqutaq allanngortinneqartarunnaassasoq.

Siumup maluginiarsimavaa, innuttaasut akornitsinni amerlasuut nalunaaquttap seqinermit malinnaajunnaarnera ippigigaat, taamaammallu atsiornernik katersisitsisoqarmat innuttaasut 2.700 missaat isumaqartut, nalunaaqutaq seqinermit malinnaaliinarani aamma aasaanerani nikisittarnera atorunnaarsinneqassasoq.

Maluginiarparput inuussutissarsiortut ilanngullutik equnganerujussuaq ippigimassuk, soorlu imaani inuussutissarsiortut aamma tunitsiviit ammasarnerisa equngasumik inissisimalernerat aningaasarsiornermut sunniuteqartoq.

Innuttaasut peqqissusiat eqqarsaatigalugu Siumut isumaqarpoq, pissutissaqartoq naatsorsuutigissallugu siunnersuut ajunngitsunik kinguneqarsinnaasoq. Siunnersuutip tunngavilersuutaani ilaatigut tikinneqarpoq, ilisimatuussutsikkut misissuinerit assigiinngitsut takutissimagaat, piffissamik nikisitsisarneq peqqissutsikkut artukkerneqarnermik malitseqarsinnaasartoq. Sunniutaasartut tamakkua sinittarnerup akornusersorneqartarneranut



timittalu ingerlasarnerata allanngortinneqarneranut attuumassuteqanngitsoornaviangillat, tassami nalunaaquttap seqinermut naleqqiullugu nikinganerujussuata kingunerisaanik pitsaanngitsumik sunniuteqartarsimanissaat Siumup qularutiginnilaa.

Siumup maluginiarpaa, tusarniaanermi akissuteqaatini innuttaasut oqariartuutaat tassaasut aaqqeeqqusisut. Ilanngukkusupparpullu pingaartumik meeqqat nikinganermut naleqqussaruminaatsitsisartut ilisimaneqarmat, aamma meeqqat adhd-mik assingusumilluunniit ersinngitsumik innarluutillit qularnanngitsumik sulii sakkortunerusumik misigisaqartarsimanissaat ilimanarluinnarmat. Inuussutissarsiortut sinnerlugit akissuteqarsimasut aningaasarsiornitta – nalunaaqutaq eqqarsaatigalugu - Europamut qaninnerulernissaanik oqariartuuteqarnerupput. Nalunngikkaluarparpummi Nunatta nunarsuarmi inissisimaffia nikisissinnaanatigu, naleqqussarnerpullu nunatsinnut uagullu atukkatsinnut tunngasussaagaluartoq.

Siornatigut periutsimut uteqqinnissaq Siumut kissaatigaa aamma Inatsisinut Ataatsimiititaliamut ingerlateqqinneqassasoq inassutigaarput, tassani tusarniaanermi oqariartuutigineqartut ilanngullugit nalilersorneqarsinnaaniassammata.

Naggataatigut siunnersuutip pingajuattut siunertaa tikilaassavarput, tassalu siunnersuut manna akuersissutigineqassappat aappaagu 24. oktober 2026 nal. 24:00 atuutilersussatut siunnersuutaasoq Siumumiit iluarisimaaratsigu, tassami piffissaqartitsilluarluni nalunaaquttap aalajangersarneqarnera suliaasariaqartoq isumaqaratta, taamaaliornikkut ilaatigut soorlu inuussutissarsiortut pingaarutillit pitsaasumik ikaarsaarfeqarsinnaanerat anguneqassammat.

Taamak Siumumiit oqaaseqarluta siunnersuut Inatsisinut ataatsimiititaliamut suliareqqitanngorlugu innersuussutigaarput, naatsorsuutigalugu pineqartoq sukumiisumik inuillu qitiutillugit nalilersorneqarumaartoq.

Anders Olsen, Siumut